

本朝分省人物考

人物考卷之三十八目錄

南直隸寧國府

秦 達

芮 麟

王士謙

何應龍

戚遜

王 著

陳 迪

俞逢辰

陳 富

丁 鉉

貢 璧

趙 昌

王得孚

張 綸

徐 說

附孫元氣

董 傑

萬琛

左輔

汪昌

附子義剛

吳璟

周怡

梅守德

唐汝迪

查鐸
徐元太

詹沂

殷登瀛

貢靖國

沈懋學

蔡逢時

葉煒

梅鼎祚

戚悌

何通泰

張綬

補遺

吳原順

陳效

王溥

蕭瑞

崔涯

屠羲英

周希旦

張克家

蕭彥

葉永盛

蕭雍

麻溶

吳仕期

本朝京省人物考卷之三十八

南直隸寧國府

秦 達

秦達字文用宣城縣人洪武十八年由國子生登乙丑進士歷事都察院奉檄清理囚徒寬嚴得體 太祖嘉其賢能特擢工部侍郎有大興作多不召尚書而召達議十九年四月議定工匠驗其丁力定以三年爲班更番赴京輪作每月如期名曰輪班匠復議量地遠近爲班次且署籍爲勘合付之至期齋至工部聽撥免其家徭役著爲令諸匠便之 上以達在

公勤慎特詔有司復其家二十年正月 上謂遂曰
春秋之世人紀廢壞孔子以至聖之資刪述六經使
先王之道晦而復明萬世有賴功莫大焉夫食菜則
思樹藝之原衣帛則思養蠶之始重其所從出也孔
子之功與天地並立故朕命天下通祀以致崇報之
意而闕里又啓聖降神之地廟宇廢而不修將何以
妥神靈昭來世爾工部其卽爲修理以副朕懷二十
二年陞工部尚書遂以古帝王廟地界通衢褻而不
嚴奏徙建于欽天山之陽以是月奏廟功成自三皇
五帝繼以三代兩漢唐宋元勲碩德比侔者列像于

庭袞冕輝煌 上甚嘉之二十三年五月詔各衙門
掌印官更署改達爲兵部尚書賜之勅誥未幾復以
達爲工部尚書十月因各處弓箭歲造不便奏准令
工匠輪班赴京歲造二十四年 上以學校爲國儲
材而士子巾服無異吏胥宜甄別之命達製式以進
上親視必求典雅凡三易其製始定賜監生襴衫縑
各一以爲天下先由是士子衣冠綽有古風焉二十
五年致仕

芮 麟

芮麟字志文宣城人洪武間以太學生授台州知府

明於治體吏民畏服嘗誥誤被逮父老泣送境外交
遺之金麟一不受既謫戍邊後以薦授建寧知府歲
饑民困發公廩賑卹又勸富民廩粟貸之民賴以濟
郡有上下關衛分兵戍守小人倚爲姦利商旅苦之
麟疏其弊以聞罷戍兵更置巡檢司鎮之新葺學宮
及朱文公祠考亭書院暇則親詣學與諸生論說經
史政化行焉秩滿赴京師以疾卒時麟父亦卒於郡
舍喪不能舉民爭出錢賻之麟爲政寬簡有古循吏
風且好學不倦尤善楷書云

王士謙

王士謙宣城人溫夷純謹人無間言問學閎博長於訓迪士多從之游者洪武中聘爲儒學訓導立講約嚴課程立教以敦本崇實爲尚而斥浮誕夸毗之士一時經其門者彬彬質有其文焉宣德中應召預脩永樂大典成祖實錄後引年致仕卒于家晚號竹西翁有竹西詩集若干卷

何應龍

何應龍南陵人少涉獵經史膂力絕人太祖時累立戰功陞指揮使從徐達北定中原還畱宿衛後復從征西卒于途子執中蔭襲次子時中聚族同居九

世不析

戚遜

戚遜宣城人幼力學才識豁達剛果有大志洪武間由國子生任兵部主事累陞山東布政勤慎愛民夙夜無怠末樂初歲大饑遜設法賑濟疏請于朝不俟報預發廩粟賑之全活無筭後為交陞布政使撫御有方安南警服

王著

王著涇縣人剛正有為洪武間由國子生任浙江按察經歷以廉能著聲嘗奉檄巡歷溫州府適大旱赤

地千里田坼禾枯著露禱三日而雨大澍偃禾皆起
慈谿虎爲患著齋沐以檄告于神虎皆斃生者亦皆
遠遁民咸德之以爲正直通于神明云歷官雲南副
使

陳迪

陳迪字景道宣城人洪武八年薦辟爲郡學訓導嘗
爲郡草萬壽賀表上覽而異之十二年近臣薦召
爲翰林編修十八年陞侍講預修大典二十四年陞
山東左叅政二十七年内艱二十八年陞雲南右布
政使時普定曲靖烏撒烏蒙諸夷煽亂迪率土兵擊

破之捷聞 賜金幣三十一年建文卽位改官制定
六部一品免尚書許沂等徵迪爲禮部尚書二年知
貢舉三年加太子太師辭兼俸靖難兵起與黃子澄
等上疏陳大計迪受命督軍儲于外過家未嘗入聞
變卽赴京師 文皇繼統召迪責問迪慢罵不屈與
子鳳山丹山等六人同日就戮時鳳山呼曰父累
我迪叱勿言罵不絕口割鳳山等鼻舌熬熟食迪迪
唾之益指斥遂俱凌刷死旣死人于衣帶中得詩有
曰三受 天王顧命新山河帶礪此絲綸千秋公論
明于日照徹區區不貳心又有五噫詩並悲烈蒼頭

侯來保者拾其遺骸歸葬縣計家橋洪熙初詔釋
迪宗姻戍邊者還鄉給產業成化壬寅郡人祀諸鄉
賢祠甲辰郡守涂觀復于迪故居立祠祀之後湮廢
嘉靖乙未驗封郎中李默謫判寧國復置祠祀郡人
私謚曰靖獻

俞廷辰

俞逢辰字彥章宣城人洪武中選充燕府伴讀已遷
教授漸親信用事建文初成祖審謀靖難逢辰叩
頭出血力諫請執藩節知不可挽間洩謀中朝使者
成祖自京師歸稱病篤大暑圍爐搖頭曰寒甚宮中

亦杖而行朝廷聞之稍稍弛其防矣逢辰與長史葛誠密告藩閫張昺謝貴曰王本無恙公等勿懈恐一旦不可測成祖猶丁寧溫諭異相效翊逢辰遺書與其子訣示以必死及兵起慟哀陳說者再四竟伏誅萬曆改元邑令姜奇方奉詔建祠

陳富

陳富涇縣人永樂戊子舉人初授湖廣布政司照磨才識閎達卓有能聲以薦超擢監察御史提督北直學校興文育士文治聿興陞廣東僉事公廉剛直植節不徇士林重之

丁 鎡

丁鎡南陵人永樂間由楷書入國子監需用宣德中擢戶部主事輕財重義以父恕有鄉行嘗於鄰居壞垣得白金首飾一囊詢其實還之力求繼父風正統中爲兩浙都轉鹽運司運使不入義外一錢以廉能著稱 朝廷嘉之賜衣楮幣錫宴於禮部十年陞刑部左侍郎踰年乞致仕卒於家

貢 璧

貢璧字廷器宣城人元尚書師泰之裔孫也景泰癸酉領鄉薦選授監察御史凝重沉毅可肩大任成化

中抗疏言星變 憲宗特識其名于御屏命巡視南畿江防江寇往往出鹽徒於時中貴人多冒禁者壁持法畧不少貸褫身廉介無異微時嘗因公事過宣鄉人以官稱之壁曰勿爲是語但可呼九秀才遷浙江僉事卒于官

趙昌

趙昌涇縣人景泰甲戌進士歷官戶部郎以忤中貴謫同知長沙時洞寇煽虐所至風靡昌督兵擒斬旬月而盡殲焉成化初再入爲戶部郎值三吳災早昌奉詔檢覈奏減秋糧三十餘萬民因以甦累遷山東

布政

王得孚

王得孚涇縣人天順丙戌進士授戶部主事決鳳陽河南之爭田萬畝軍民不敢混欺出守武昌解督責催征之令剖獄允當自以無冤民教風振士民敬服立三等九則之法以均田役公私稱便歲饑多方賑貸民無流徙有殺人以其妻而髡爲僧者捕置于法折妖僧繼曉之橫恣奏毀其坊牌誥勅焚其妖書卒擒而斬之時守備太監假以進貢漁獵細珉奏革之湖湘水旱相仍襄府正有事于營建䟽罷以寬民

力擒妖術道士李孜省於南京械送戮之京師年四十有九偶有所忤卽拂衣致仕而歸享年九十有一曾孫廷幹以年十七登進士第得孚猶及見之

張 綸

張綸字大經其先鄱陽人在宋高宗時有爲寧國路總管者因家宣城於是爲宣城人後有皞者累軍功世襲富峪衛千戶綸成化癸卯領順天鄉薦明年登進士第初知鹽山卽明習吏事誅鋤豪惡奪貴戚侵田弘治辛亥徵拜監察御史監蘆溝稅巡內庫巡光祿寺皆以嚴辨聞甲寅巡居庸諸關邊備必飭武臣

有縱恣者繩以法風采凜然尋以內艱歸丁巳終喪
改雲南道按真定諸郡賊吏望風斂戢任縣令以非
法殺人罪未正鞫實坐之富民被盜誣讐家煨煉獄
成綸察其冤脫論死者十三人於桎梏他平反又百
十餘人平鄉令欲增淤田之稅且百頃綸曰河濱淤
決不常可遺他日患耶事遂寢會清寧災陳時弊十
事多見采納壬戌以久次陞光祿寺少卿時歲用不
足上疏浮費所當節者數事尚膳中官索上供踰額
詆侮僚屬又疏請司禮監懲之嘗助獻內壇 上顧
問近臣是非張御史耶益 孝廟臨御既久方疇咨

俊又以綸嘗建白故屬意焉已擢通政司右通政戊辰擢都察院右僉都御史瑾熾日熾御史有枷項於通衢亟偕僚長救之五年擢大理寺卿奏獻輒忤瑾意時時與辯逢瑾怒不爲少動致仕歸史強珍家爲讐所訐三子論斬坐沒入江西人民吳某沿俗競渡偵事者誣以爲私造龍舟亦坐沒皆賴綸力辨得末減興襄二府訟田不決者二十年命往處帖然歸奏稱 旨有醇醪寶楮之賜歲辛未中貴錄囚欲脫豪右殺人之罪者持不可擬竟如法高陽民王豹爲奸僧所罔刺臂肉爲龍形捕獲者坐以叛欲侈其功

綸謂法止梟首用是不合調工部右侍郎癸酉改刑部侍郎尋轉左時偵卒多羅織無罪力言於僚長務核實母致誣枉乙亥往覈代王博王兄弟互訐事會晉府慶成王獄久不決亦命綸訊鞫詳明奏當皆麗於法回疏處宗室選婚及祿米折銀二事偵卒獲入京虜謀連引且至百人會鞫欲連坐綸曰謀若是其多耶止罪二人餘盡釋丁丑以九年滿陞都察院右都御史時方奉命南行還歷淮泗目擊水災慮民窮盜且延蔓乃以給賑蠲徵諸事宜上請所司皆議行之山東民趙萬興假妖言惑衆取美女以后稱有

二儒生從之爲漁色計也偵事者獲之將以叛論綸
辯其非叛得不族蓋綸留意律法善察姦僞而斷獄
平恕未嘗過求故自任臺憲以至持天下之平於死
囚多所開釋庶幾於民自不寃及世廟登極方窮
治正德間諸惡黨繫臺獄者數十人乃數其罪狀以
爲當誅而不可救其嚴於懲惡又如此綸焦勞感疾
懇乞休退疏八上始得俞旨有月廩歲祿以寵其
歸踰年卒於家年七十自筮仕以來所居必盡職求
稱其在言路持論必存大體恥掇拾長短以爲名大
學士李文正稱其善自樹立與世之徇勢浮沉無所

顧惜者不類平生所著有出巡錄憲臺奏議棘臺駁稿三使錄晚效文正公爲詩渾厚清婉有敬亭稿若干卷藏於家

徐

說

附孫元氣

徐說字以中宣城人戶部郎巖之孫巖性剛直有清操累督關陝徐州軍儲著聲績說登成化戊戌進士授禮部主事歷擢南京右通政謙抑端謹雖秩列閒司亦能修舉故典隨事盡職嘗持節冊封靖江王資贐甚厚一無所取致仕歸務以忠信先鄉里年八十餘卒其齒德爲獨尊云曾孫元氣以壬戌進士歷官

通政司使元太以乙丑進士歷官南京刑部尚書氣沈機遠識達於政體太才節磊落丁丑以吏部郎分校禮闈黜江陵之子懋修出爲山東叅政時江陵疾東藩爲祈年于泰山太獨不與後巡撫四川戢松番之亂其績尤偉兄弟皆稱一時名臣焉太另有傳

董傑

董傑字萬英號五城涇縣人成化丁未進士授湖廣沔陽知州入爲刑部員外弘治初孝廟數御講筵近暑不輟冢宰王恕言不宜過勞且曰臣以官保名此亦王躬是保之意也傑疏恕所言非是忤旨謫

四川都司知事考最轉知鈞州再轉刑部員外郎中
出守保定正德戊辰遷河南山東叅政布政使擢右
都副使巡撫江西在四川攝邛州事興水利以溉田
勝民甚德之掌松蕃茂州事督運調撫有方夷人畏
服在鈞州豪右斂跡田里樂生若學校農桑尤加之
意遂致時和年豐粟有一莖五穗瓜有一蒂五實者
在刑部嘗慮囚山東人無冤抑在保定滯獄千餘牒
詞數千百紙比至甫半月剖決殆盡郡當孔道使客
結軫密邇京師私牘盈篋傑應接如流不茹不吐人
皆敬憚號爲神明他如練民兵積芻粟厥後霸州盜

起保定獨以有脩無患在山東嘗部京儲不忍解戶
稱貸率身任之在江西四郊多壘晝夜經略不遺餘
力賊以漸平未幾以疾卒于官計聞賜祭塋傑有豪
氣每以才略自負故居官多有顯績焉

萬琛

萬琛字廷獻號東山宣城人狀貌魁梧雙目炯炯性
剛直負氣不能爲澳忍事少游郡學有文聲宿學老
儒多所推重督學御史浮梁戴公少許可得其試卷
大器之成化丁酉中應天鄉薦屢試春官不偶弘治
癸丑謁選天官得江西清江令以母憂去服闋改令

瑞金居數月閩廣賊作夜半殺門卒攻城突入時瑞
民洶洶竄伏左右有強之急去者琛怒髮上指挺然
曰吾去土誰與守吾生平欲丈夫其行而學兒女子
以自免於節義謂何遂從民兵數十人迎敵殺賊二
十人有奇相持至翌日賊少却薄暮力屈爲賊所得
挾至舍所問庫藏所有琛不爲屈詈不絕口賊憤遂
遇害守臣上其狀贈光祿寺少卿賜葬祭命有司立
石廕其子麟爲國子生琛家居喜賑卹貧乏爲閭里
所德治尚寬簡平賦省徭興學禮士屢白疑獄瑞金
舊俗苞苴公行琛一切禁之無敢奸者時賊寇臨江

瑞州諸郡被毒多矣而以身徇民者周副使憲萬知縣二人已耳

左輔

左輔字弼之涇縣人弘治丙辰進士授浮梁令時景德鎮民相構爲亂輔爲開諭禍福衆遂解散調景陵遷瑞州府同知因忤瑾黨謫南安教授再謫南城瑾誅起知寧州謝歸獨寓沙園以述作自娛輔恬靜端慤讀書探究理奧著有周易本義附說太極後圖南庠日講等集藏於家

汪昌

附子義剛

江昌字大祺宣城人性至孝母喪廬墓三年會歲大
饑里中死者枕藉于路而昌家貧力不能卒脩棺木
撤所居樓板爲棺以瑾殍者後以歲貢謁選得江西
進賢主簿故事堂上三廳油燭皆庫夫賠辦日率二
十斤最爲苦役每客船到埠必坐守官批甫得回屢
訴之監司不獲免昌署篆日俱申除之居官六年一
塵不滓去之日舒狀元芬約縣中耆老題名于清正
坊昌堅辭之曰廉固吾分豈以此鬻聲名乎昌所居
處距城五十里許御史傅炯高其名按府事畢差官
登請相見辭不至後御史道經其家相距二里許再

請見終不往但遣其子致謝而已子義剛亦貢生也
制行端方唯諾循禮人有盛饌相餉見其以左手舉
筋力却之或詢其故曰此必執拘不聽父母教誨者
姿貌魁偉猿臂善射隨父任進賢時山寇曰支麻喻
者聚衆以應濠藩圍其城義剛與知縣劉源清披甲
上馬射却之賊踞山絕其汲道直指聞而檄兵援之
戮力勦平以邊才薦選州同卒于京今其子孫貧甚
傭耕以自給而已

吳璟

吳璟南陵人正德庚戌進士官四川僉事時流賊鄔

藍之黨遁入川東進逼江津璟受檄守之賊至璟督
民兵奮力衝陣斬數十人復入城堅守屢乞援兵不
至久之城陷被執而死事聞贈副使官其子鎬爲宣
州衛百戶予世襲

周 怡

周怡字順之太平縣人登嘉靖戊戌進士授順德推
官以廉敏聞歲己亥 肅皇帝南狩縣官供芻餉
章聖太后喪道順德徵發萬計並出怡指畫減費什
三境內無擾 召拜吏科給事中時相嵩鑿太宰讚
積有却日圖奇詆虜 鈔西北邊在事諸臣亦輒不

相能怡大憤疏奏凡數千言大畧謂風教之大禮讓
爲先朝廷之上大臣爲首朝廷有違言之隙則讒譖
之釁長于外大臣有動色之爭則攻訐之禍流于下
鑿嵩市恩脩怨私訐背詆嵩尤威靈靈凌逼百司
往論嵩者皆以罪謫去今宣大戒嚴總鎮又各持意
見甲可乙否大敵在前而文武搆釁非國之福也言
甚剴切 上恚怡疏中有 陛下日事禱祀而四方
水旱未銷之語嵩以重螫已間入詔廷杖下錦衣獄
乙巳采箕僊言釋之閱月復被獄丁未二殿災又釋
之相傳 上寔聞空中有神語釋三人云三人者御

史富平楊爵工部郎中泰和劉魁並以言同繫者久之隆慶改元徵怡以給事遷太常少卿使獄濟瀕行疏陳定君志重詔命敬大臣擇左右勤朝政五事忤旨調山東海右道僉事轉南國子司業丹陽姜寶爲祭酒御士嚴正怡寬博劑之人並稱得體明年擢太常少卿提督四夷館未至病卒疏請致仕猶謂臣卽死當奮作國家鎮地鬼云怡方介峻潔訾笑不苟論事輒義形于色忠亮天植累躋彌堅海內士大夫望之如祥麀威鳳以未大竟其用爲時所歎惜云恒推明正學以至誠無息爲大宗屋漏不愧爲實際識者

以怡諸所建樹殆非無本矣隆慶壬申臺臣張佳胤郭莊檄邑建專祠祀之郡人私謚曰莊簡著有訥溪文集二十七卷行于世

梅守德

梅守德字純甫號宛溪宣城人少以穎異聞爲諸生時旣寧李公默由驗封郎謫倅合試六邑士獨拔守德及太常卿周怡曰此兩人國器也令交拜郡庭而李公蒞盟焉因膳之庾舍中時督其課程暇則語以當世之故曰以脩異日實用登嘉靖辛丑進士授台州府推官台及寧紹並臨海彊族奴官闡出中國貨

海外互市乘汎揚颿官不可誰何而三郡奸徒有投諸島爲主與者倭釁萌矣因條其事於直指使者直指獨以屬之於是裁抑豪貴以伸里氓嚴明海禁干槪甚密積習頽風庶一湧洗秩滿擢戶部主事是時周公怡以吏科給事疏論相嵩下錦衣獄三年矣威焰正張莫敢聞獄中事者獄亦甚秘獨時時具橐饘焉京兆尹胡奎嵩私人也謀貳冬卿乃有釐弊政黜庸汚以安遠邇之疏臚列其貪鄙狀顯斥之上玄修勤醮祝太常官皆道士世蕃父子相與朋比卿徐可成者前得蔭復求改官力疏辨駁事得中止改戶

科右給事中奉 命冊封遼府而世蕃益積不能平
乃故宣言于衆曰紹興缺守兩浙之倭勢熾矣今須
得幹濟疆毅之守吾觀未有踰梅掌科者也今在使
願且爲朝廷借之翌日吏部推上矣道聞赴郡首講
脩倭之策蒐軍實葺征餉郡兵頓者汰之客兵驕者
厚其月糧而嚴其法比以至繕城垣飭舟楫海上諸
要害地咸宿以重兵焉倭稍緩則召父老而問疾苦
以苦莫大于湖稅召諸生而問風俗以季末之奢靡
而違禮傷教也于是一意均賦湔滌弊源出乾沒之
田若干畝民始有定業而稅不偏歸于貧戶矣乃新

王文成之講堂敦請龍溪先生主師席以多方訓士
尊高年禮隱逸燕饗有禁游觀有禁秘圖山人楊珂
者三造其廬竟不見也碑高士里于其居而士彬彬
知所向方矣甲寅陞山東曹濮道兵備副使東省惟
兗西最患盜盜各有大猾爲之保任流徙無常莫之
究詰至則鉤校其主名而擒大猾之尤者立撲殺之
盜無所附麗漸以衰止踰年改本省督學副使疏條
濶目評隲試義一見可決平生新城有陳生者席資
殷富陶真人爲 上祈年泰山託賂焉真人以檄送
陳生于學立視責之禁錮終其身其於諸生禮貌優

而持法嚴侃侃無所殉稱良督學未幾陞雲南分守
左叅政念母恭人春秋高不能捨而爲萬里之行會
以捧賀入京遂上疏乞休屢請得 俞旨歸則多田
居不時入郡然地方利病必進告縈起流止條分縷
析有司咸聳然虔聽焉細氓有負寃抑無所申者必
力爲請白終不使其人知迄今邑有批政民有枉誣
通邑必翕然曰安得更有梅大叅其人者乎以萬曆
丁丑卒得年六十有八山東紹興各祀名宦而有司
亦奉其主祀于鄉賢

唐汝迪

唐汝迪字吉甫號惠菴宣城人也父蚤卒閱五月始
生生三歲母亦捐養兄汝棐甫三週耳煢煢孤哀
子依仲父平野公以爲命少穎敏超絕丰儀端偉十
四補博士弟子時比士者北平楊公才菴雅負知人
獨鑑賞甚曰是兒有奇骨不三十立矣十六受餼十
九領嘉靖丙午鄉薦成丙辰進士謁選當在司理時
分宜柄國奇其狀擬處以桑梓地意欲羅致門下也
則之姜公寶匍伏力辭乃得真定真定三輔名區法
比如蝟一取三尺衡之平反無害郡有豪不法者按
其人匿不受捕間行金于里他日行縣過其家綜跡

得之竟論法一郡震洗再期薦牘凡十九上會天官
郎缺例得進西吳一人有兩邑令以千金行倖事覺
汝廸反以恬補司勳郎然非柄相子心也而時
時徵德馬漠不爲應晉司封郎時德劄榮在位輒
茅靡取合獨孤立介行端步詳視人不敢干以私會
飲柄相子家凡先後同署咸在柄相子欲因以酒引
巨犀奉觴謝不能任彊之一太常從旁力贊焉艷然
而起覆犀于地酒淋漓被若面更起繆爲謝顧之已
在馬上矣以此噉之甚諷言官論其傲力請移疾被
旨留着用先是被是 旨者率寘大辟家人環泣怡

然不爲動伺其寢勦息如常再疏予告治一舍圃上
水環垣以小艇往來讀書其中足跡不逮城市郡邑
長罕得見者督學天臺耿公行部畢百里式於廬對
譚兩日夜不能去丙寅春計中蜚語謫倅禹州載禹
志者云唐公顯允豈弟視篆矚然民有訟妻殺夫者
自誣服得其寃立釋之市犬殺人逮其主抵死獄成
矣曰國狗之瘕人何與焉後有經其地者會二子皆
文學日夜尸祝之矢世世無忘唐公也丁卯知歸州
未任移貳萊州尋入南戶曹郎辛未知雷州府雷濱
海易亂島夷充斥海酋犄角爲應海南酋李茂尤黠

當事者徵兵往擊指揮高卓死焉歲除倭夕突城下
急登陴授兵收諸舟楫之在南岸者火竟夕燭天凡
三日夜不休保其城海酋許俊美乘倭犯高州破電
白又自瀾州突陷錦囊沒黃隆謂我勢分益跳梁難
制壁城下竟單騎出一盖一吏馳入其壘諭以 聖
天子威德酋頓首伏地趣具食飲賒如平時日晡乃
還郡民遙見羽蓋歡呼聲震地賊勢且奪移去東岸
已而俘倭五十餘人獻捷請撫往請撫者名爲安插
而實擇腴壤趨便利先啗守鉅貲守度無如何則請
于監司直指而可之酋乃空其地之民人而廬其居

宅樓其子女田其田有司莫之敢問于是奮筆請于當道曰是本齊民負浪作奸提納款之空名而實事衝擊我不能制其死命而與之論曲直通往來何其無大體宜勦不宜撫請分布要害部置兵總王道成等奮擊親爲擐甲督戰賊敗走仙門港已復敗之沙頭洋有識其爲賊偵者一人足無拇乃謬下令曰東海地瀉鹵老幼不得着屐果得無拇者名翁蔭一訊立服逮五人誅之民自是無與賊通者而賊益窘矣間道赴嶺西道告撫舟回遇王道成擊沉之招撫官亦與俱溺守道督過于道成力保之曰此何足問招

撫二字擲之大海可矣復條上當事練土著以固其志兼福廣以全其力調船烏兔合踪追捕以輔其急報可賊益大困酋黨陳理語其屬曰以唐侯仁信不卽受命而以逆軍吏今局局游釜中吾與若俱烹何爲也遂鯨其首出泊海康兵夾攻之悉潰賊遂平是役也凡兩越歲歲斗食百錢千里負擔輒爲賊蠶食且也主客紛呶倭番遞發爲調租餉通協濟繕城隍逸丁壯葺烏艚精間諜聲拯援迄無遺策事罷杜口不言功甲戌入計江陵相慰勞有加意俟其陳乞欲以爲德但唯唯謝不敏而已僅晉河南治河副使丙

子八月河決崔家口出小浮橋總理者以河所從來者高下流淤淺數爲敗徐州人段守金言開復新集舊河將行之上書言河性不常未易以人力通塞引河而南有侵嚙陵寢之虞聿興大工有聚衆意外之變彼濱河民意或移壑或射隼或逐蠅爲身家念耳謂輿論僉同殆不其然書上議乃寢再書便宜六事曰弭盜曰安民曰經藩祿曰定傳計曰改鹽課曰謹照提旣布河南北至今便之丁丑入賀歸里歲大侵移書撫臺孫公極陳顛連之狀田蕩爲巨浸民化爲野鬼不亟蠲賑邑且林莽孫公惻然檄有司周恤上

其狀賜免田租之半還任會江陵歸葬道出雒諸司側行檄席負糶矢先驅越全境乃已第逆之出境無苛禮戊寅移河南叅政未幾移叅江西湖西道轄吉安袁州臨江等郡丈畝獨平奉保甲惟詳鎮市連族他畸零阻逃悉汰之民以無擾尋遷廣西按察司使以辛巳四月抵官觸瘴癘疾作三書乞骸骨屬勉留遷延竟以不起時合肥秦公寵憐而具百金贖施恭人泣謝曰大夫生平不識阿堵物未亡人不敢傷其志悉卻之卒之日長子一澄才九齡次子一灝尚在腹今並舉於鄉矣生平孝友天至內行淳儉父事兄

終身與合爨有詢其生產幾何者惘然曰不知也請以問伯兄凡里中關民瘼士學者必謁當道婉與陳乞終不敢自歆其德居恒無宛言無疾色賓至無貴賤無留門者卽童孺與敵禮卽之溫然襲人和雖別歷多奇問之絕不以口至于聲色器玩泊如也有嘉議十五卷行于世

查鐸

查鐸字子警別號毅齋涇縣人爲諸生時刻厲攻文藝尤有志於正學嘗曰匪學胡文匪聖胡學先後講解於師友間涵躋最深嘉靖己酉舉於鄉報至猶偕

同志聚講抵暮而罷如弗聞也屢上春官不售南還
卽台山與少傅穎陽許公方伯拙齋蕭公職方洪潭
焦公相切劘而從遊若蕭都御史彥趙少宰士登蕭
學使雍趙憲副善政探討上下彬彬然盛已乙丑成
進士授德安府推官清介絕俗不爲煩苛其於單赤
尤曲體其隱諸生葉潤爲讐所中爲直之至以忤直
指不顧聞令有欲那移乾沒自潤者微感之令其省
改不以摘發之名自居也其鞫獄民就理恐後情法
不蔽者爲平亭之諸開釋者自慶幸恨就讞晚久之
治理流聞薦剡且上一同官直指欲並舉而疑其年

鐸曰第論能職不耳如以年則某長於彼且二歲直指絕歎以爲難愈重之未滿考以卓異徵道經新鄭鐸故新鄭相所舉也時家居見鐸思致書都門爲之道地堅卻之以此忤其意入京拜刑科給事中轉戶科右仍轉刑科左屢疏勸經筵覆邊功定管議舉人才言不爲矯激而識者服其得體休暇輒從海內名碩結社論學以爲常未幾新鄭因緣中涓起且兼銓部勢張甚欲有所修舊隙一日問鐸以直報怨意何居若弗喻其指答問一以恬夷劑之令其自解又欲出一罪人與進其私黨兩執不從因與之左補山西

參議適當表賀疾不行撫臣迎新鄭旨論致仕父老
留之車爲枳油然不以屑意也新鄭罷臺省文章薦
復補舊任父老爭歡迎之至則革蒲東停喪敝習定
爲葬儀勒令互察得歸土者不可勝數有妖似獮能
匿形而人言多煽惑出示驅之妖謝相知者曰查公
正人吾不敢犯爲避去兩閱歲晉廣西兵備副使抵
家而奉父諱公除仍以舊職領廣西驛傳之任三日
卽以入賀行還任三月移疾歸中丞郭公六下劄留
之不可遂翩然東返爲復水西書院倡明理學卽單
筥後進折節引之未嘗不與講敵禮也平居不至郡

邑至于均田救荒則力言于當事爲鄉人無窮計臺
使者時累疏以薦而已決志堅臥矣鐸豐下廣穎音
吐若鐘生平品格如鳳麟心事如天日言行有壇宇
坊表其於世人窺瞰依附非特所不屑抑亦所不知
其學則篤信文成致良知簡易直截爲三字符特講
者各立門戶而獨守之不易謂良知不執於見卽曰
虛不染于欲卽曰寂不累于物卽曰樂無有無無始
終無階級俛焉日有孳孳終其身而已居恒闡然自
修恥不爲表暴然學者讀其書知其學之深考其行
而不合于書者蓋寡也最後疾作族兄秀視疾問曰

心得無動乎曰能病吾身耳吾心何病且而起索衣
冠端坐逾時遂瞑享年七十有四

徐元太

徐元太字汝賢號華陽宣城人南京右通政說之曾
孫南京通政使元氣之弟也幼有大志慷慨闊達讀
書一日數行下筆有排山倒海之勢而玄理奇窟卽
老宿莫不斂衽避舍者嘉靖辛酉魁南省第二人乙
丑成進士知江山縣尋丁內艱復知魏縣清以不刻
威而有恩發奸摘伏民自無寃以卓異召拜銓曹主
政轉員外郎丁丑分校禮闈所拔士蘇濬等一十八

人先是漉以閩省第一著聲久司試者相期勿失此人太獨首得之撤卷衆皆驚其竒識會江陵欲私其子黜之不錄卒爲所嗾出叅齊藩江陵病約請禱于岱宗太正色拒之曰此舉何名子爲父禱乎臣爲君禱乎衆皆負慚無地未幾江陵卒而天下莫不高其直躬勁節矣擢憲閩中會越有脫巾之變復移臬兩浙至則廉首惡者寘于法宥其脅從一軍晏然旋晉京兆植良鋤奸質劑約信以寬和博大之治懷柔其民而王畿之內千里誦政聲焉已而西夷發難擢撫川蜀奉 旨相機鵬剿西夷盖古回紇吐蕃遺孽也

密邇松茂聯絡諸番山險水深徑通一線故各寨恃此跳梁而我不得其要領撫之不見爲德討之無以樹威節肆螫毒至虔劉鎮官軍兵等千三百有奇鎮巡監司莫可誰何會楊柳寨首酋蠡爾騷動太密授方略督兵蕩平斬其渠降者死者無算然各寨猶負固如初也巳奉 上旨一應進剿河東河西以次進克擒斬小姓王荅甘燕等三十餘寨番族埋奴等數十人相誓以永無侵叛捷聞陞兵部右侍郎仍巡撫其地嗙 入冑監未幾而建越逆酋倡亂五衛橫被 爲撒諸酋大逞狂謀攻克城堡誘殺兵

將具題奉 旨勅處會議三路進兵分布統領齊集
漢土官兵太自臨陣督戰親執枹鼓直搗賊巢凡七
閱月而底定是役也前後克寨以二百計斬獲以五
千七百餘計俘鹵以二千二百餘計生擒以四百餘
計焚毀礮房以千六百計革去浮賞等費省 國家
金錢以數萬計投降夷裸男婦以二千二百餘計退
還地土爲里者以九百七十計東靖黃沙西靖黑水
東西白草諸寨望風款貢比于編戶事聞 上心嘉
悅降勅褒獎晉二品服俸再廕一子旋以右司徒總
督倉場以少司馬協理戎政會倭奴蹂躪朝鮮樞臣

感于宵議廷論主和太獨議戰本兵喉之遂陞南京
刑部尚書以疾請告得旨回籍調攝病痊起用林
居垂二十年酣史耽書怡情山水千牘不及有司至
地方大利病大興葦挺力爲侃侃言之捐貲三千建
長安壩蓄洩有法旱溢無虞萬戶咸食其德家奴稍
不就檢柙立箠磔之自居鄉居官無敢有攬秘而矯
虔者享年八十有二而卒卒之又三年其孫日晉伏
闕以請疏雖下部卹典尚稽人咸懷仰止之思云

詹沂

詹沂字浴之號魯泉宣城人生而穎慧秀拔嗜學不

轍鄉薦後攻苦猶然諸生絕不知有干謁事成隆慶
辛未進士授新建令仁慈明肅均里甲定徭賦析楊
晝卧鞭朴弗施庭讞常清鍍金不黷平寃獄周隱瘼
合邑呼曰神君所擢拔生儒皆名士後多以科第顯
秩滿以卓異徵士紳扳轅之不得尸而祝之今口碑
猶嘖嘖也考擢南吏科給事爲人坦夷真率不峻城
府至政之得失人之賢不肖辨析推擇不少假借議
論排山撼嶽無所回撓值星變疏修實政以息天警
纒纒千言剴切激直詔察天下官員卽疏糾政府私
人時江陵柄國若烈日之經溽暑而沂又所舉士也

憾特甚無何江陵奪情議起南中闕然乞留疏具獨
不署名曰事係綱常吾不能媚附相君取姍笑於後
世衆相與目懾之及江陵給假治喪廷臣交章趣還
南中議繼疏以進直止之曰彼未有終制意趣之何
爲于是讒構紛起而山東僉憲之命下矣未幾裁革
冗員而承望風旨者請革回籍矣辛巳京察復以原
給事降處迨江陵敗起知奉化奉化夙稱難治治之
如新建時初不以遷謫傳舍其官也清介寬和與民
休息大旱虔禱澍雨立霑甫期而慈父母之稱億萬
同口陞禮部主事轉員外郎遷光祿丞歷南尚寶太

僕太常卿所至織介無染宿弊一清嘗署篆應天歲額發絲價數萬例留十一名佐公費司庫以請厲色拒之一切奇羨不入及繼者乾沒而臺中彈文有曰守者之墨大愧于署者之清當是時直聲介節久震重于朝著矣第甘退忘進意氣條然真有以朝市爲大隱之意故徘徊聞局幾二十年始擢左副都御史署院篆守正奉公怨勞不避兩主外計一司內察弊恬退拔清脩斥貪黷輿論攸孚時臺臣寥寥如晨星催請選補疏凡四十上唇舌幾焦始得 俞旨遼東缺按臣額係選差疏謂遼陽爲國右臂自惡璫激變

重以奉拿官吏人心惟懼不寧建酋跳梁蓄謀已久
兼并屬夷交通北虜懷奸叵測一旦逆我顏行千里
沃壤坐見陸沉矣擇熊公廷弼往按不十年而陷城
隕將向者之言歷歷奇中始知老成之謀國深遠也
妖書起事連大僚禍且狃噬會勘時力言一涉深求
損國家元氣不小止坐繳生光一罪正法遂得寢陝
中稅監肆螫秦民告變 上撤回遂以殺人刼損誣
奏咸寧令滿公朝薦逮繫力言朝薦賢令柰何輕信
中璫文致其辜亦竟得釋楚藩之變陳善後事宜歸
權撫按凡親郡王違制皆得以白簡從事添入勅內

從之復以周給事怡抗正 世廟久未易名疏請賜
謚署院五年六歲再考 上累有羊酒錙幣之賜偶
浮言波及遂毅然曰大臣義不受辱何難一去明讓
且懸車之年已及安知言者非補我之黔息我以陰
乎急請休致 上溫旨勉留乞休愈懇解組封印廬
郊外候 命嗣得旨有潔身忘義之語我朝大臣未
有掛冠行者掛冠自沂始歸里杜門掃跡與舊知爲
漿酒藿肉之娛每春煦秋爽風泉雲壑杖屨所至暢
志而返生平無疾言怒色卽小生穉子與之敵禮見
者忘其爲尊貴也性篤于孝友建宗祠分祿予敦禮

訓一族彬彬興于文教焉年八十子應鵬成丙辰進士欲題疏歸養急止曰吾受國恩愧未捐糜矢報爾事主之年卽將父之日也丁巳夏偶沾微恙遂致彌留盥櫛焚香望北稽首端坐而逝子鵬啣恤陳乞詔贈左都御史賜祭葬如制所著有潔身堂存稿

殷登瀛

殷登瀛字子登宣城人別號少莊後弃官歸里取歐陽子六一之義而廣之曰修竹一林青山一畝平泉一池合子爲九因號九一居士云少有異志性恬漠而資機穎嘉靖乙卯舉于鄉明年試春官不第會其

兄負國稅八百餘金有司寘于理慨然自認代輸家
產已罄三年尚不能杜至壬戌正月竭力稱貸以償
前逋甫得計偕北上遂以是年成進士第七人授海
寧令寧巖邑而民黠善逋賦有十餘年不輸者比至
無問新舊隨多寡聽其自入且許以他物抵賦未期
月而夙逋盡清簿牒山沉朝讞夕遣訟者艤舟以待
不俟終日而官事已結有海寧殷青天升米官司不
費錢之謠久之兩造漸稀桁楊庭卧因以 聖諭六
語著爲解訓教誘其民駸駸乎政成而俗化矣值內
艱歸服除再補襄城盖是時襄城辛公自修居首垣

稔習其治寧狀力請于銓司願借殷公福吾襄四年以治行卓異聞行取命逮擬處以諫垣疏請就南生平秉性清介澹於進取視長安之奔蹄駑駘心殊厭之不若留都之足以養恬也當路反以爲矯復出爲新喻令二年自是益有東山之志矣尋擢南戶部主政權稅清江擇廉能尉一二人董其務第執要受成而不親其利署後故有望淮亭新之更名浴心蓋取淮陽汪穢洗濯塵襟之語以自況仍勒石記之晉南禮部員外旋晉吏部郎中居官以儉佐廉耳目玩好都絕從不識有苞苴之事亦無敢以私干謁者嘗冬

寒僚友。國爐議事諸僚。樞衣皆錦綺。重裘獨布襪。單澤而已。衆服其儉。而自慙其侈。出爲金華守。乙亥冬。命下。明年乞休。疏上不待郵報。懸車竟歸。或有勉留者。謝曰。陶令惜腰。吾亦惜膝。乃有腰膝訟于心官之說。又撰九一居士說。以見志歸。則卜築城西杜門掃軌。屏冠服不御。絕不與朝貴往還。卽寒暄之牘亦謝絕不通也。郡守鄭公繼之。重其品。亟欲見之。三造門始得延欸。遂定交焉。宛令以不得見爲憾。構于鄭公。公曰。居士數來謁乎。曰未也。數以書瀆乎。曰未也。顧無奈其簡亢耳。公曰。此居士所以爲賢。宛之望也。反。

見非乎令大慙服爲人坦衷夷度自處甚約而性喜施每出必懷金于袖遇窶者隨意賑之憚獨孤子之人踵相錯于門日置米于闌以待餓夫寒冬或遇裸而羸者解裏衣衣之自甘凜戾不恤也鄰有貸者後力不能償謀鬻其妻聞之急折其券一廣文貸金北選遣其子持十金酌之曰一寒氈何遽得此卽還券而却其金然之時已垂索而食貧矣一體一巒然且不給而周人困阨不憚心力赴之會巡撫孫公光祜蒞郡郡人以爲壬戌同籍也持百金求爲關說峻却之有有鶴尚嫌添口累無魚翻羨浣腸清之句構書

莊數楹聚書其中披誦不異寒生上下數千年考鏡
精核若燭照數計若絲之紛而各引其理若節之解
而悉導于窾其於升沉顯晦直指爲浮雲一空浪花
千點付之一笑故其發爲詩文攄胸中之所自得而
無僂薄詭宕之習謂聖人之學載在典冊炳如日星
而後儒註疏竟落支離于是作聖學正脉若干卷經
傳微言意義幽奧而後儒見解失真多有舛誤於是
作微言辨說若干卷自有文字以來或史臣之訛謬
或著述之假託或英雄謀國未露之深機或奸邪竊
名可誅之隱惡皆闡而發之作九一犀燭集若干卷

皆藏于家壬午直指蔡公說將薦於朝力謝之曰豈
可復令北山移文耶因題于水亭之壁曰相追皓月
常攜杖不負青山早掛冠自是詩酒自愉寤歌不輟
怡情風壑雲泉間者十有五年以萬曆己丑病卒卒
之日其索如洗棺殮之具相顧莫措營貸翌日而始
成服郡中知與不知咸相與悼惜曰嗟乎安得清介
不滓若殷公其人者邈乎不可覲矣子之輅髫齡失
怙攻苦茹荼雅雅追庭訓成萬曆癸丑進士出爲福州
守以廉正著譽三年奏最晉階中憲大夫賜之勅命
有曰一麾出守決志東山烟霞抗物外之懷經史決

疑中之義行標壇宇學富縑緗貧而好施死無以殮之輅叩首流涕曰主上聖明已爲老臣傳神矣聞者咸快以爲實錄云之輅今官刑部員外郎

貢靖國

貢靖國字玄忠號洪山宣城人生而端凝沉毅質言無譁白意坦衷不識人世有巉坼刻峭之事者事父母孝事伯兄湖源公友凡一切筆楮書籍以及衾禩衫履之屬無不與伯兄共年十四補郡學生謁客而歸靴履間偶有澆泥迹伯兄怒指之曰此何爲者而尚爲童子戲也耶面扑之唯唯順承而已時郡守近

溪羅公倡道于宛刻以聖學自砥尋繹精猛至廢寢食大意紕虛解救實行不爲一切利脫悠繆之說會母喪柴毀骨立日夜爲孺子泣不欲生哀慕之久彷彿覩其狀間聆其聲一夕父病甚篤侍藥榻前狂怖不知所計昏瞶中恍見其母撫而慰之曰無過思頃之父病漸蘇詰朝而霍然愈人咸異之萬曆癸酉領鄉薦明年遂成進士以父憂歸服除授刑部主事時江陵之勢方熾嘗欲周內憾者餌之銓地勿徇也令其子嗣脩以通家刺投謁還其刺于從者曰誤耳彼此原無世誼也力爭之尚書前憾者事竟得白都人

有以大猾當坐者賄葉御史匿不爲理復力爭之尚書前臺臬與部曹等耳假令一御史得以獨行其意高皇帝之置是司也奚爲哉竟按其人于法而御史以例遷去秩滿陞福建泉州府守臬當海壖地僻俗窳縉紳之籍甲于天下往往持有司短長抗弊其法至則循行郊垆進邑長令召民父老問所在疾苦曰吾無奇也有將安施絃之急也絕之鮮之烹也攬之矣抑鈺筦之習塞告訐之門罰不過束矢扶不踰拾楚各輸肺腑無冤結舌者課士衡材上下其駟不爽累黍士皆翔厲于聲教二年之後盜賊日尠奸人去

入他郡豪大家無武斷編下戶不得侵辱私無徇情
公無沮格七邑之內翕然大治甫三歲陞浙江鹽運
使兩浙當財賦之區辟之大官入者染指乃著鹺政
類畧行之飭煎辦清丁蕩恤商竈視事甫期六被薦
剡邊腹之商共相指目謂從未有此仁廉司主者會
場官米長科以鹺院肺戚作奸犯科比周爲虐廉其
狀下寘于理而鹺院固庇之乘其校閱武闈授指監
司釋其繫聞之卽日投劾以歸謂不得其職戀戀于
尺組亦何爲乎後雖有蜚語坦然當之若罔聞矣家
籍世資稱殷厚歷宦幾二十年垂橐而歸家無長物

嘗曰人皆因祿富我獨爲官貧治一室于北郭之外
距城四十里絃誦嘯咏其中扁其堂曰樂野深居簡
出意象儵然兩世不析箸俸祿所入咸貯之公令伯
兄之子督之值歲稔欲賙其貧者而力不贍乃從郡
侯貸廩粟數百石裁其甚否而糶之會歲有秋盡指
鍾畝之人以輸于官無沮色矣年六十有五而卒卒
之日郡守親視其殮嗚咽不忍仰視題其旌曰鄉大
賢而誄中曰心同青天皎日行若和風慶雲人以爲
此兩語足可狀其生平云

沈懋學

沈懋學字君典宣城人父侍御古林公寵蒞官嚴肅嘗備兵湖廣疏捕九龍灣大賊瀦其巢又嘗跡一寺僧汚妖得卽用鐵錘碎其顛立斃致政里居孜孜爲德不忍使民間有饑寒冤抑事懋學生而跌宕競風槩少善騎射又能於馬上舞丈八稍詘首書生弄柔翰非其好也然率意落落隨其曠之所止伸泚立盈有藻思書法出入王虞自行韻格腕疾於烏天文地理陰符黃石參同內外丹星相卜醫之學襍及五木六箸藏驅累丸蹴踘投壺彈箏捩箏一切弛弛可喜之藝術無所不涉於人亦無所不交丁卯舉應天一

不第跳而之塞上辦襍胡兒射生飲潼酪馳驟飛狐
花馬池間悉躡諸部虜所繇出沒走集曲祈處歸以
語人曰河套可復也時大將軍獵得名馬悍齧不可
絡懸雙蹄秣之大將軍飲之酒霑醉矣前曰吾欲一
試或諫之此馬驕豢思故水草縱之卽募塞去矣不
聽強轡勒跨上果大嘶噉掣如暴風雨去幾薄虜王
庭急以兩袖撲馬頰障其目甫控取回道須臾至矣
門外屢騎交錯客座常滿數從里中貸金錢貰酒餉
客歲斥父產償之最後客益集產益落里人出責者
沓奏詢於門親族相唇至舉以爲諺丁丑與計偕越

元且後不能裝已進士射策擬第三 天子親擢第一
一甲中人始狂顧嘆鄂矣江陵當國負意寵收人材
宿其名器愛重之又憑其子嗣脩同鼎甲連結爲通
家好朝夕往還卒亦不可得而親踈也亡何江陵相
有父之喪奪情之議起日絮語其子嗣脩輩勸奔喪
已移書李侍郎某切責臺省官侍郎江陵所親特主
奪情議者也未幾臺御史保留疏出未幾六科九列
保留疏出聞之髮豎于頂曰勉留出自 天子可耳
出自言官若何人道盡矣戟手拉其同官吳趙兩君
子倚之角之吾二人也吳趙兩疏上曰是且不測

吾意不得獨生則豫爲草疏救兩君兩君疏上之三
日廷杖命下則袖疏入長安門遇座主徐吏部詰以
所往因索疏觀之曰中有謬誤可再商也疏旣不得
上志意無所伸於是飲淚吮血調兩君出國門遂移
病歸歸而相國聞前事乃大恨怒我愛沈生何如者
沈生乃爾何望他人爲然而江南大吏爭欲陰中之
以市江陵矣會宣有吳生仕期亦嘗爲擬上執政書
大吏竟屬所私以妖言律捕仕期下於獄欲以鉤致
懋學仕期死蕪湖獄中竟不肯承誣由是得免因與
所善馮開之屠長卿爲虎丘西湖由拳樵李之遊雙

鬢絲竹晝夜歌舞不廢或有危之者曰中外貴官方
四跡先生盍閉門謝客斷聲伎可乎不答久之江陵
自覺不容于正人亦偃蹇失意而其諸子數書敦迫
謂言其父恚不能以金馬尺席地留君典也而一時
林伏諸君子輩趣之出爲治舟宛水之涯若爲將駕
然者而以一日病死矣死之日州里遠近不問識不
識咸咨嗟歎恨其不可作至萬曆庚戌子有則成進
士官行人乃始交手而相慶曰名臣有子然未幾亦
卒于官

蔡逢時

蔡逢時字應期別號鼇陽宣城人也生而有奇紋繞腹高肉二指十歲能屬文卽已下帷攻苦不丙夜不休萬曆丙子舉于鄉時計偕者盛輿馬騶從獨緼袍策蹇走數千里奏牘南宮丁丑中禮部試會傳母夫人病篤卽兼程以歸抵南徐聞訃一慟幾絕居喪三年足不及有司門猶然授徒自給而已庚辰廷對授浙江海鹽知縣邑苦潮患間井蕭條稅糧夙爲猾胥所主與里豪共爲乾沒積不可搜剔比至廉得其故令輸戶與糧役覲面籌算絲毫無得欺隱者宿逋立清又邑中豪室匿其田額以其虛稅竄之貧者下里

拊丁守空戶以待役荒區零戶並正額以齊徵沿習
既久民憊益深會有文畝之役於是銳意更始積畝
爲里履畝而稅里既均而糧自不得詭圖籍以正饒
瘠得平豪大家不得有所撓令下雷轟咸拱手加額
曰二百年來始得此公平世界已乃積腋粟以備凶
歉築臺堤以障下流富而且教人文鼎起治行於兩
浙稱最前後薦剡咸以卓異聞應得內召會隣封宵
人踞都諫以不得關說故移授儀部祠祭司主事濱
行戶頂香板留士民走數百里擁衛不得發飛塵空
集屋瓦皆震旣去而碑版祠祀不一而足抑不知佩

德之深何以刺骨乃爾已而移儀部員外郎中議藩
封清祿糧著爲令凡代祀禱雨壽宮山陵者再四有
鏹金文綺之賜癸巳陞浙江按察司副使備兵甌括
兩汎躬爲防守組甲一新王中丞弘大擊節嘖嘖不
已乙未春斬獲倭七十餘人義當捷聞會朝鮮之役
大司馬力主和議恐以斬殺生倭虜心兩臺愆吏之
掩其事逢時抗言持不可謂將士血戰誦其功何以
勸後來乎當事者反以蜚語中之補調廣西蒼梧道
鑛稅四出粵璫尤橫每事力裁抑之璫窘甚乃置酒
以好語相慰誘曰某在公轄內而輒掣肘如此恐無

以報 聖天子命曰吾非故與公左粵西不毛稍一
動搖於國奚賴如事事關白可行無失 聖天子愛
養元元至意吾寧有意與公左乎璫使唯唯終不得
肆志以去陞河南叅政分守河北河方四潰人民流
徙又苦盜賊橫劇於是築沁堤懷衛間河由故道永
不爲患戢巨盜禹州界民獲安堵拒山東協濟之派
分扼親藩出入之有度至更有不職者卽百足之蟲
必逐之去才有可策卽小吏注下考必爲申白大槩
守正不阿必行已志而後已丙午轉右布使攝司事
已酉擢四川左布政使已離汴河而會沈中丞季文

袁左轄奎兩不相能皆先後同年僚友也力從中平
停袁反疑之深乃中以流謗而毅然投轄歸矣歸則
絕口不譚時事不與朝貴通一寒暄問訊屏坐處亦
不喜爲耳目之玩種花植卉并非其好一榻兀然圖
書數卷而已間與同志者商訂性命之學徃來雲山
水西間里中鄉紳林居者結爲真率社月再會會必
竟日杖屨所至大暢襟期而後返于于徐徐蓋七年
而以乙卯卒年六十有八卒之明年鹽官士民相率
走吊墓下咸大慟而去未幾崇祀名宦亦幾於召伯
之在陝南朱邑之於桐鄉矣

葉 煒

葉煒字文光號玄峰宣城人萬曆丙戌進士除上高令調煩餘姚餘姚爲兩浙最繁劇邑治之以靜默閒雅寬然歲月有餘汝洗牟山諸湖及海墾地多爲豪有力者所侵清復之并作堤堰盡蓄洩之制碑之以垂永久秩滿遷戶部主事歷員外郎中出爲河間知府始至遇大旱饑且疫斥鍰勸輸具粥藥所全活無算任丘有殺人而其叔中常侍爲芘得緩死竟論如法陞浙江按察副使備兵寧紹時有市故中丞居者馮勢侵據至折其舊估之半追如其直而止禁俗之

溺女與好言機祥僧尼巫覡之流一時震洗未數月
䟽請致仕兩臺力挽之至六七申請再不得封篆間
道以歸煒容貌豐腴意氣溫夷平居絕不見喜怒及
臨事挺直無所牽隨居嘗曰天下惟道德不可毀世
間獨真實能長存佩其言可以維俗

梅鼎祚

梅鼎祚字禹金宣城人叅政梅公守德季子也孕七
月而生幼清臞甚然英穎絕倫始非與兩兄俱補邑
庠隨餼廩一月而兩兄相繼捐逝叅政公哀悼之極
更抱隱虞恒欲其焚筆硯棄諸生而寄業于太學謝

非所願也請以百金治裝南遊秣陵至則盡傾橐金
市書以歸杜門伏誦者三年凡三蒼六籍以及百家
之言無不淹博時宣僻處一隅無四方人士往來俗
樸固而質木從未有治古文辭者三年內謝交息游
獨時時與沈君典私相劇砥時出其所爲詩若文者
呈叅政公輒擊節稱善因以質於王元美汪伯玉劉
子威諸人無不遜心歛避者鼎祚生無他好手不識
衡量目不知綺麗足不履田塍凡飲食寢處悲喜愉
悴一寄于書居嘗謂曰吾於書若魚之於水一刻失
之卽無以爲生其爲文深心精詣不豪于才不伎于

氣字字咸有思詣法嚴而語工與元美諸人狎主齊盟懸書滿于國門金石之文徧于遠邇卽織言刺楮猶足以果學人之腹而性復至孝叅政公里居時日侍左右以色養歿而事母恭人終身爲孺子慕百道承順務靳得其歡心萬曆癸未巳當歲序有司促裝赴選母恭人偶抱疾未瘳終不忍捨而去陳情于督學升其次者後以內艱妨兩選歲巳丑始以序貢然年甫及艾耳或勸之仕不就太倉相欲以孔目薦之謝不赴晚讀書於蕙樓以一素帷羃之誦輒達曙老而愈篤久之膏地薰漬帷上布皆易而爲緇當是時

海以內無不知有梅禹金者或以使事宦游過宛上
問道就訪劇譚終日而去曰得見禹金此行庶幾不
俗而郡邑長吏干旌造其廬時時賓禮之每欲得一
言以爲重然有賄之居間者推而遠之若將浼馬梅
氏之族殊富隆貴甲于國中族子弟間佻脫自恣歲
時蒸嘗合而聚于祠中會諸長老檢押之面扶其不
率者若何事縷縷數之令其愧改故群數百人不聽
于族之富貴者而奉其一言紛解爭熄循循然凜于
德讓先之以躬行教自尊也論者嘗謂才士多無行
此語獨于禹金不驗矣歲乙卯疾將革神情不亂言

笑晏如口占數詩而瞑所著有鹿裘石室稿子寧草
庚辛草近集未鐫輯有書記洞銓八代詩乘古樂苑
宣乘翼才鬼記青泥蓮花記漢魏詩乘行于世

戚悌

戚悌號節軒宣城人謙和清謹以太學生爲南海丞
萬曆癸未清理戶役悌董其事悉心釐革餽送一無
所染事竣一邑稱平當事者委覈疑獄情法兩全不
爲苛比有豪奸撫拾中於藩司邑民代爲訟誣累數
千人會邑令段克允入計當道以署篆屬之從民請
也後遷判山東曹州去士民垂泣而相語曰安得復

有廉惠如戚丞者乎邑番舶出入丞主權稅後里中
有爲南海丞者獲貲巨萬重貨無算當悌歸時垂橐
而入僮僕咸有饑色卽魯山一縑亦無有也兄慎登
嘉靖甲辰進士仕至楚雄知府狷介自持洗手視事
冰蘖之操始終若一卒于官至無以爲殮具而與悌
同時者有松陽簿嚴有敬亦以清介寬仁見稱云

何通泰

何通泰字季貞以字行寧國縣杜遷鎮人也幼剛奮
有大志及壯當元至正間四方兵亂所至荼毒乃倡
義合其鄉之人馮其故所有之土城結兵修堡結爲

行伍以障一方稱名社長衆則以義兵爲號云紅巾賊曰倪文常者率衆掠其境以鄉兵易之夜爲劫城之計張左右翼出擊大敗之斬首數十級賊遠遁後斬黃兵壓境本路守臣楊公仲英欲乘其未至逆之通泰上其議謂戰則城薄而民疲難以持久不若嚴兵固守彼無以測我虛實且意在他往非決志頓兵於此無櫻其怒庶幾保無虞耳後果如其言楊公重禮之至正十七年 大明兵下寧國楊公出降喜曰天命有屬吾輩可安堵無憂矣議將撤衆歸農爾僞吳兵突至連衆數萬夾攻其壘遣人招之降不應攻

愈急勁卒劉因善言于通泰賊勢甚張衆寡不敵降之便立斬以徇賊渠魁躍馬而呼曰降則富貴立至敵則髻髻不遺通泰曰壯士死則死耳豈從汝爲賊耶命其弟通虎射之應弦而斃賊怒縱火焚之城陷通泰慷慨謂衆曰事至此無能爲汝衆可降吾義不受辱也遂自頸衆曰公死吾屬何以生爲俱赴火死無一降者萬曆十四年里人上其事于有司立祠祀之額曰義烈論者比于田橫之客而其名尤正云城未陷之先有義僕携其少男匿山谷中事平力耕以贍數傳而後族乃大蕃今有孫一蛟居金陵之江寧

里

張 棨

張棨字士儀別號本靜涇縣人幼聰穎異常五歲口授諸書義卽了了常聞雞聲忽呼其母曰小學云事父母雞初鳴咸盥漱今雞鳴矣何不起母笑曰汝纔讀書便曉其義耶應曰我願爲此豈徒曉焉而已聞者知其非凡兒八歲就外傳能屬文十歲遍治諸經有聲鄉邑十三遭父喪朝夕哀悼不離喪次執禮如巨人十五學益弘博爲文切理不拘時格十七當甲午會北江聞人公校士宛陵閱其文嘆曰何物英俊

而究理若是首拔應試補邑廩員自是譽日隆隆起
祭益究心時務慨然有經濟志觀書獨得大旨嘗語
人曰吾輩誦法孔曾豈瑣瑣章句爲哉尤精于易中
丞澤江歐陽公撫江南延爲塾師與論易大奇之曰
仕儀論易卽田何復生無以過也越二歲歐陽文莊
公爲南祭酒倡道金陵講明陽明先生之學因往從
之文莊公與之語卽言下領悟自是服習其教累年
不歸稱爲高弟繼從東廓鄒公緒山錢公龍溪王公
遊銳意研求謂聖人可學而至歸築室聚徒日夕會
文講道其間每論經傳發揮入微談世務切中肯綮

疊疊若懸河指點人病痛輒中膏盲聞者多所興起
或至泣下以故無論遠邇悉造其家學焉南都江浙
吳楚之間所至名公鉅卿咸折節加禮貴者忘勢長
者忘年有古王通氏風先後督學如午山馮公裁菴
楊公象崗胡公翠崖黃公每試輒居首極加敬信守
已嚴介毫無私請從者亦莫敢干以私廣德張守聚
徒百餘敦請主教未幾旬多士翕然興起臨行以百
金贈之辭曰吾得英才而教育之足矣堅却一無所
受產不及中人或勸爲子孫計笑曰終日營營爲兒
女謀吾實恥之事母董氏至孝每夜必聚兄弟子姪

伯生母側病則親供湯藥汚必躬滌不遺諸婢每事
務得歡心母嘗語人曰某兒在家卽病可勿藥愈也
事二兄若父弟棣尤母所鍾愛孳孳教之補邑庠生
尋欲就例卽捐已產助之歲辛亥母董氏病篤夜跪
額天願以身代及卒哀痛踰常三年戚容不改築永
思山房守墓不離尤敦睦宗黨著張氏家規遇不給
者隨其所有助之歲值荒歉百計賑貸族有子弟之
才者多方誘引自是張氏內無訟外無侮文學之士
日彬彬出焉與朋友處每以名節道義相勸勉事有
不直輒極口直言至於利害以身任之一時涇之士

氣感知振作倡義捐貲建水西精舍迎緒山錢公龍
溪王公歲臨主會與貢受軒周訥溪沈古林諸公合
併論學涇之人士津津日有興者由是水西之會名
天下其學以孝弟爲本以名節爲重以收歛精神爲
切要以對景磨瑩爲實功以萬物一體爲志願以繼
往開來爲準的性資英邁精神爽朗卽意氣眉睫之
間能轉移人心真有囊括宇宙睥睨千古之意一時
見者傾心聞者景仰真豪傑士也雖微有英銳之氣
而爲世扶名教之心識者恒諒之矣

補遺

吳原願

吳原願宣城人宋狀元潛之裔孫也博學明經善詩文隸書洪武間爲本府儒學訓導歷國子博士致仕後應 召纂修永樂大典書成乞歸特 賜金綺馳傳以榮其行

陳效

陳效南陵人成化辛丑進士任戶部主事歷員外郎中庶正有爲曹務具舉大司徒秦公鉉雅重之諸司有缺咸委攝焉察察每有舉動必諮而後行嘗以磚石甃諸倉儲積地米無泥滓浥腐之患實爲永利擢

知興化府政事文學愈精士民感悅閩稱良守後仁
逆瑾以歸所著有東江集

王溥

王溥字景淵涇縣人任泉州府經歷時逆賊鄧茂七
等流劫七閩人皆披靡影匿溥獨嬰城自固晝夜晝
戰守之策擒斬有功賊退復合餘黨復奔匿屬縣標
掠爲害溥自督兵隨在勦夷民始安又事平陞本府
推官卓以能廉著譽未幾卒今祀于學宮

蕭瑞

蕭瑞號赤山涇縣人正德戊辰進士出知靖安邑當

凋敝民多流徙瑞至一意招撫約已裕民初不爲驚
擊勾距之政未幾流民復業者千餘家邑漸殷阜有
劇豪方嘯衆爲亂瑞密遣人獲其魁渠其衆盡散民
向也恒懼今也帖息亦莫有能明言其功者久之以
王文成薦改令廬陵立保甲清徭役提衡于畫一之
規而民戴其清淨焉徵拜南京福建道御史風稜嶽
嶽正直不回以見忤當道出爲僉憲陞福建參議致
仕歸

崔涯

崔涯字若濟太平縣人八歲卽有文譽嘉靖中進士

選授監察御史遇事敢言慨然以天下爲己任時稱
爲真御史視鹺河東䟽鹽政七事歲凶賑活甚衆晉
民祠祀之既按福建陳山海十二策至若妖虎投斃
孽鵠寃平咸爲異政後劾汪冢宰鉉忤 旨見斥著
有筆山文集

屠羲英

屠羲英字淳卿號坪石寧國縣人嘉靖丙辰進士授
戶部主事給餉至邊制臺聞其名郊勞贈貺禮加隆
焉竟謝勿受無何監山東允逢歲不稔民艱于徵輸
故爲寬其期會民德之爭輸恐後尋轉貴州司郎中

邊儲向從改折庾廩空虛請自雲中上谷營平漁陽
諸險塞處覈士馬之數而羸縮其芻糧俾緩急足恃
分宜柄國歛足戢影不一濡足故十年不得調久之
副浙憲督視學政汰澆薄釐浮靡士子轉相告誡惟
禔躬飭行之是兢兢守父制歸起復視學四川陸參
政累轉南太常少卿攝南京兆篆方正不撓有故交
干以私峻拒之會雍士久弛于繩檢 朝議重其兩
督學政士風丕振以南太常管大司成事亦異數也
躬闡性命之學諄諄提諭園橋門觀聽者聞所未聞
爭自濯磨于聲實焉會江陵有父憂南九列競䟽奪

情聞之喟然嘆曰黃扉之上墨綬聽政不能爭顧導之耶况儼然爲人師表寧與世浮沉爲曩倫玷迄不署名以是忤執政會晉光祿正卿卽拂衣而歸臺使交疏薦起堅卧不應竟以疾終有司奉其主祀于賢祠 神廟特恩賜之諭祭子立極丁未進士官太守玄圭庚子舉人

周希旦

周希旦旌德縣人嘉靖壬戌進士授興化府推官時當倭夷殘破民不聊生一意寬恕以撫瘡痍平反者甚衆民無有聲寃于肺石者徵拜陝西道御史疏請

崇 聖學保 聖躬劾閣臣高拱恃小材而乏休容
之度并劾其黨落職家居十七年後科道會薦起補
浙江道御史條陳止貲途罷內操御經筵巡視京營
上足糧養馬補伍省役四事晉尚寶卿轉大理寺丞
陞應天府丞時值旱荒請發帑金二千復節省千金
以佐賑貸全活甚衆會有修却者以年老論罷時年
甫六十二也不復䟽辨投綬而歸曰泉石煙霞吾素
志也後以上壽終于家

張克家

張克家字有光宣城縣人嘉靖四十四年進士由戶

部主事改雲道御史建言降濬縣丞隆慶六年起戶部主事累陞雲南副史卒歷官數十年囊無贏貲里無拓壤今子孫有貧不能自給者

蕭 彥

蕭彥涇縣人嘉靖間進士任杭州府推官讞斷明允民自不寃徵拜禮科給事中轉戶兵都給事前後章疏凡數十上如罷復丈議懇田議河西防夷諸論條晰諸邊機務無不關切于時政者陞太常少卿未幾擢僉都巡撫貴州雲南鄖陽揔督兩廣四任開府節制諸番皆居蠻烟瘴雨之中更值傾敝敗壞彥忠猷

式著恩威並宣在黔則樽俎而擒逆寨在滇則指顧
而靖亂兵折世師之驕柱暹羅之請皆能不動聲色
逆折陰萌豐績偉功昭于夷夏人稱爲兩間清淑一
代珪璋洵非溢美云陞戶部右侍郎卒于官 恩賜
祭塋贈都察院右都御史謚定肅

葉永盛

葉永盛字子木涇縣人萬曆十七年進士由蘭溪知
縣選雲南道御史二十四年巡按江西二十七年巡
鹽浙江力抗內璫保護商民奉有 嚴旨欲加浙稅
若干力諍而免浙人建祠于西湖以志不朽三十五

年陞太僕寺少卿尋請告歸居家閉戶習靜絕不與外事未幾而卒

蕭雍

蕭雍號慕渠涇縣人都御史彥之弟也生平志於聖學每從諸先儒語錄殫精尋繹務窺其不言之奧其視世間榮利若委塵耳萬曆癸未進士工部主事陞員外郎中雖壯歲升華常有歸田之志出參議江西轉浙江副使督視學政精心品鑒不爽錙銖而尤以敦名行重實學爲先兩浙稱公明焉事竣竟投劾致政而歸矣久之兩臺疏薦復補廣東副使從左叅政

轉廉使而浩然之志堅不可回累疏乞休甫得致仕
益夙抱碩寬之樂而澹情簪組之榮者也今祀賢祠

麻溶

麻溶宣城人萬曆癸未進士授戶部主事管青江浦
開有廉譽轉銓曹歷驗封司郎中出爲叅政廉使陞
山西左布政使所至猷望茂著風紀肅張懲墨斥貪
能聲奕奕庚子歲卒于途年四十有五耳撫臣魏允
貞特以清正疏聞 詔贈光祿正卿祀于黌宮

吳仕期

吳仕期宣城人萬曆己卯江陵相不奔父制乃以積

咸關言者之口仕期憤然以三綱淪矣大倫敦矣擬
爲上相國書媿媿千餘言內有舉朝皆綿羊皆啞子
之句書未上而其稿已有傳于外者南操院胡櫛江
陵私人也太平同知龍宗武爲櫛里人相比而命邏
者獲之置于蕪江獄內當宗武讞問時梏而訊之曰
爾一書生何知朝事或親識中有諭之指者一舉其
人爾罪可脫意蓋耽耽于沈公懋學也仕期曰男子
生負剛腸有所觸而爲不平之鳴此事何假人筆舌
爲榜掠數百身無完膚終無所承認櫛乃以其事聞
于江陵江陵回札曰孺子何足較斃之杖下可也宗

武于是命獄卒絕飲食五日不死獄卒私以囊沙撲其面凡七日而氣絕士莫不聞而寃之至萬曆辛卯孫公惟城爲甬臺御史其婦貢氏抱孤憶錄奔號南中孫公具疏以聞得旨下於理而檟與宗武皆遣遠戍 勅賜建坊以示風勵復祀其主于學宮